

Ovelins ed ovelets chi s'uneschen ad ün flüm cumünaivel

In gövgia saira ho la Scoula La Plaiv – dimena il s-chelin ot pels scolars da La Punt fin Cinuos-chel – inauguro in ün ram festiv sieu nouv purtret directiv da scoula. Quel es gnieu elavuro d'uraunt ils ultims duos ans da la magistraglia e cun sustegn dals scolars e'l cussagl da scoula.

«Nus vaivans già pü lönch l'ideja da metter ad ir ün purtret directiv per nossa scoula. Fand retscherchas vainsa vis cha tels purtrets directivs sun pelpü ün documaint cun bgeras paginas e text. Per nus nun es que però gnieu in dumanda », disch Julia Christandl. La mnedra da scoula da la Scoula La Plaiv daspö l'an scolastic 2021/2022 agiundscha cha que d'eira important da svilupper qualchosa cuort, pregnant e sainza bgeras flosclas. Il grand böt d'eira eir da visualiser il purtret directiv in ün möd graphic, simpel ed inclegiantaivel. Uschè ho la squedra da dudesch magistras e magisters cumanzo avaint var duos ans cun scolaziuns in quist connex ed es eir gnida accompagnada d'uraunt il process da David Halser da la Scoul'Ota da pedagogia a Cuira. Cun sustegn da las scolaras, scolars e'l cussagl da scoula es alura uschè naschieu ün muossavia per la Scoula la Plaiv – il purtret directiv «unir – crescher – fluir».

L'ova scu fil cotschen

Punct centre dal nouv pled directiv es l'ova. Il fil cotschen sülla visualisaziun grafica sun l'En e tuot sieus flüms laterels traunter La Punt Chamues-ch e Cinuos-chel – dimena que's tratta d'üna survista da las vschinaunchas e fracziuns chi faun part da la Scoula da la Plaiv e da las ovas in vicinanza. «L'En chi passa tres l'Engiadina collia eir tuot quists löes ed el ramassa l'ova da divers ovelins ed ovelets chi'd haun tuots üna egra via fin ch'els rivan insembel in l'En», declera Julia Christandl ed agiundscha: «E precis scu l'En dess eir nossa scoula esser ün lö inua cha tuots vegnan insembel – melgrò d'inuonder cha derivan», declera Julia Christandl.

Uschè sto alura minchün da quists dudesch flüms laterels sülla visualisaziun dal purtret directiv per ün punct important pel muossavia da la scoula, chi vain visualiso cun ün verb. Quists verbs – chi'd haun eir tuots da chefer cun l'ova e chi vegnan declaros cun üna frasa – simboliseschan las visiuns e'ls böts da la Scoula La Plaiv. Uschè as chatta que traunter oter ils verbs crescher («nus sustgnains ed accompagnains il svilup individuel»), sclarir («nus ans tadlains tiers vicendaivelmaing e promovains il dialog e comunichains aviert») u rinfras-cher («nus dumandains e promovains creativited e vains il curaschi per novas ideas»).

Inauguraziun zieva duos ans lavur

«A me d'eira que fich important cha nus ans pigliains avuonda temp per quist proget. Nus vains scu team discus sur uras mincha pled e mincha frasa. Que d'eira ün lung e bun process, impustüt pel svilup da la squedra da magistraglia », disch Julia Christandl. Zieva duos ans es quist purtret directiv alura gnieu inauguro in gövgia saira e que in ün ram festiv cun preschantaziun, musica ed aperitiv. Perque ho alura eir minchün da las 41 scolaras e scolars implieu üna butiglia a chesa cun l'ova da sia vschinauncha e quella ova ho alura minchün e minchüna implieu in ün aquari per simboliser la cumünaunza da scoula. La visualisaziun da

quist pur-tret directiv es gnieu installò sün quatter grandas tevlas d'aluminium güsta sper l'entreda da la scoula uschè cha quel resta adüna preschaint scu visiun l'l minchadi.

Posts per declarer il putret directiv

In connex cul nouv putret directiv es eir gnieu installò sülla via d'ir a spass dasper l'En traunter Madulain e Zuoz ün gir cun dudesch posts, inua cha que's po cun üna app ed ün QR-code gnir a savair dapü davart il muossavia da la Scoula La Plaiv e que in möd interactiv e cun schoglier ingiuvineras. Zieva duos mais sper l'En fo quista cuorsa da post alura auncha müdeda sper la via traunter Chapella e Susauna. Cun quista spüerta vül la Scoula La Plaiv eir render visibel e declarer il nouv muossavia a tuot la glieud interesseda chi nun ho gieu temp da gnir a l'inauguraziun.

«Que's drouva ün putret directiv per gnir d'accord scu cumünaunza da scoula e per musser in che direcziun cha nus ans vulains svilupper – e que eir sper tuot la materia da scoula. Perque es que eir important cha quist putret as po eir svilupper inavaunt e gnir optimo», disch Julia Christandl.

Martin Camichel/fmr

Il nouv putret directiv da la Scoula La Plaiv. Il fil cotschen es l'ova ed ils ovelins ed ovelets chi's uneschan tar l'En. A dretta las scholaras e'ls scholars da la Scoula La Plaiv vi dal fer la cuorsa da posts sper l'En traunter Madulain e Zuoz. fotografias: mad